

四庫全書

集部

欽定四庫全書

集部

御定全唐詩錄卷九十五

六

詳校官左中允_臣瑋五珠

主事銜_臣徐以坤覆勘

總校官原任中允_臣王燕緒

校對官中書_臣王鍾泰

謄錄監生_臣閻學朱

欽定四庫全書

御定全唐詩錄卷九十五

李洞

洞字才江唐諸王孫也嘗遊西川慕賈浪仙為詩
鑄銅像其儀事之如神時人但謂其僻澁而不能
賞其奇峭唯吳子華深知之子華才力浩大八面
受敵嘗以百篇示洞洞曰大兄所示百篇中有一
聯絕唱西昌新亭曰暖漾魚遺子晴遊鹿引麝子

華不怨所鄙而喜所許昭宗時不第還蜀

近體詩

送雲卿上人游安南

春往海南邊秋聞半路蟬鯨吞洗鉢水犀觸點燈船島
嶼分諸國星河共一天長安却回日松偃舊房前

鄭補闕山居

高節諫垣客白雲居靜坊馬饑餐落葉鶴病曬殘陽野
霧昏朝燭溪牋惹御香相招倚蒲壁論句夜何長

送沈光赴福幕

泉齊嶺鳥飛雨熱荔枝肥
南斗看應近北人來恐稀
潮浮廉使宴珠照島僧歸
幕下逢遷拜何官着茜衣

鄆郊山舍題趙處士林亭

圭峰秋後疊亂葉落寒虛
四五百竿竹二三千卷書
雲深猿拾栗雨霽蟻緣蔬
只隔門前水如同萬里餘

賦得送賈島謫長江

敲驢吟雪月謫出國西門
行傍長江影愁深汨水魂
節

攜過竹寺琴典在花村饑食山松子誰知賈傅孫

送遠上人

海岳兩無邊去來都偶然
齒因吟後冷心向靜中圓
蟲網花間井鴻鳴雨後天
葉書歸舊寺應附載鐘船

下第送張霞歸覲江南

此道背於時攜歸一軸詩
樹沈孤鳥遠風逆蹇驢遲
草入吟房壞潮衝釣石移
恐傷歡覲意半路摘愁髭

送人之天台

行李一枝藤雲邊曉扣冰丹經如不謬白髮亦何能淺
井仙人鏡明珠海客燈乃知真隱者笑就漢廷徵

維摩暢林居

諸方游幾臘五夏五峰銷越講迎騎象蕃齋懺射鵬冷
筇和雪倚枯櫟帶雲燒從此西林老瞥然三萬朝

送張喬下第歸宣州

詩道世難通歸寧楚浪中早程殘岳月夜泊隔淮鐘一
鏡垂雙鬢全家老半峰無成來往過折盡謝亭松

送盧郎中赴金州

雲明天嶺高刺郡輒仙曹危棧窺猿頂公庭掃鶴毛出
軍青壁罅話道白眉毫遠集歌謠客州前泊幾艘

江干即事

病卧四更後愁聞報早衙隔關沈水鳥侵郭噪園鴉吏
瘦餐溪柏身羸凭海槎滿朝吟五字應不老烟霞

登樓

川上值樓開寒山四面來竹吹人語遠峰礙鳥飛迴生

死別離陌朝昏雲雨堆誰知獨立意濺淚落莓苔

題雲際寺

開門風雪頂上徹困飛禽猿戲青冥裏人行紫閣陰臘
泉冰下出夜磬月中尋盡欲居巖室如何不住心

同僧宿道者院

攜文過水宿拂席四廊塵墜果敲樓瓦高螢映鶴身點
燈吹葉火談佛悟山人盡有棲霞志好謀三教鄰

古柏

手植知何代年齊偃蓋松結根生別樹吹子落鄰峰古
幹經龍嗅高烟過雁衝可佳繁葉盡聲不礙秋鐘

宿長安蘇雍主簿廳

縣對數峰雲官清主簿貧聽更池上鶴伴直岳陽人井
鎖煎茶水廳關搗藥塵往來多屐步同舍即諸鄰

秋宿潤州劉處士江亭

北夢風吹斷江邊處士亭吟生萬井月看盡一天星浪
靜魚衝石牕高鶴聽經東西渺無際世界半滄溟

冬日題覺公牛頭蘭若

天寒高木靜一磬隔川聞
鼎水看山汲臺香拂雪焚鶴
歸惟認刹僧步不離雲石
室開禪後輪珠謝聖君

寄竇禪山薛秀才

竇嶺吟招隱新詩滿集賢
白衫春絮暖紅紙夏雲鮮
琴經江絲細碁分海石圓
因知醉公子虛寫世人傳

送盧少府之任鞏洛

從知東甸尉銓注似恩除
帶土移嵩朮和泉送尹魚
印

牀寒鷺宿壁記醉僧書堂下諸昆在無妨候起居

送人歸覲河中

青門塚前別道路武關西有寺雲連石無僧葉滿溪
河長隨鳥盡山遠與人齊覲省波濤縣寒牕響曙啼

圭峰溪居寄懷韋曲曹秀才

南北飛山雪萬片寄相思東西曲流水千聲瀉別離
巴猿學導引隴鳥解吟詩翻羨家林賞世人那得知

過野叟居

野人居止處竹色與山光留客羞蔬飯
洒泉開艸堂雨餘松子落風過木苗香
盡日無炎暑眠君青石床

送從叔書記山陰隱居

山頂絕茅居雲泉遶枕虛燒移僧影
瘦風展鷺行疎卷箔清谿月敲松紫閣
書由來簪組貴不信教猿鋤

終南山二十韻

關內平田窄東西截杳冥雨侵諸縣黑
雲破九門青暫看猶無暇長棲信有靈
古苔秋漬斗積霧夜昏螢怒恐

撞天漏深疑隱地形盤根連北岳轉影落南溟窮穴何
山出遮蠻上國寧殘陽高照蜀敗葉遠浮涇斲竹烟嵐
凍偷湫雨電腥閑房僧灌頂浴澗鶴遺翎梯滑危緣索
雲深靜唱經放泉驚鹿睡聞磬得人醒踏着神仙宅敲
開洞府扃碁殘秦士局字缺晉公銘一谷務開午孤峰
聳起丁遠平丹鳳闕冷射五侯廳萬丈氷聲折千尋樹
影停望中仙島動行處月輪馨疊石移臨砌研膠潑上
屏明時獻君壽不假老人星

題咸陽樓

晚亞古城門，凭高黯客魂。
塞侵秦舊國，渭浸漢荒村。
官路颺書燼，人家帶水痕。
獵頻虛塚穴，耕苦露松根。
牆外峰粘漢水，中日晃原。
斷碑移作砌，廣地灌成園。
北馬疑眠磧，南人憶釣湓。
橋間野鹿過，街靜禁鴉翻。
灘鼓城隍動，雲衝太白昏。
標衣多呂裔，荷鍤或劉孫。
弔問難知主，登攀強滴樽。
不能扶壯勢，冠劍惜乾坤。

歲暮自廣江至新興往復中題峽山寺

薄暮緣西峽停橈一訪僧鷺巢橫卧柳猿飲倒垂藤水
曲巖千疊雲深樹百層山風寒殿磬溪雨夜船燈灘漲
危槎沒泉衝怪石崩中臺一襟淚歲杪別良朋

贈曹郎中崇賢所居

間坊宅枕穿宮水聽水分衾盡屬僧藥杵聲中搗殘夢
茶鐺影裏煮孤燈刑曹樹蔭千年井華岳樓開萬仞冰
詩句變風官漸緊夜濤春斷海邊藤

上司空員外

禪心高卧似疎慵詩客經過不厭重
藤杖幾攜量磧雪
玉鞭曾把數嵩峰
夜眠古巷當城月
秋直清曹入省鐘
禹鑿故山歸未得
河聲暗老兩三松

贈永崇李將軍充襄陽制置使

拜官門外發輝光
宿衛陰符注幾行
行處近天龍尾滑
獵時陪帝馬鬃香
九城王氣生旗隊
萬里寒風入箭瘡
從此浩然聲價歇
武中還有李襄陽

春日隱居官舍感懷

風吹燒燼雜汀沙還似青溪舊寄家
入戶竹生牀下葉隔窻蓮謝鏡中花
苔房毳客論三學雪嶺巢禽看兩衙
銷得人間無限事江亭月白誦南華

廢寺閒居寄懷一二罷舉知己

病居廢廟冷吟烟無力爭飛類病蟬
槐省老郎蒙主棄月陂孤客望誰憐
稅房兼得調猿石租地仍分浴鶴泉
處世堪驚又堪愧一坡山色不論錢

華山

碧山長凍地長秋
日夕泉源聒華州
萬戶烟侵關令宅
四時雲在使君樓
風驅雷電臨河震
鶴引神仙出月遊
峰頂高眠靈藥熟
自無霜雪入人頭

送包處士

愁思枕月卧瀟湘
寄宿慈恩竹裏房
性急却於碁上慢
身閒未免藥中忙
休拋手網驚龍睡
曾掛頭巾拂鳥行
聞說石門君舊隱
寒風濺瀑壞書堂

斃驢

蹇驢秋斃瘞荒田忍把敲吟舊竹鞭三尺焦桐背殘月
一條藜杖卓寒烟通吳白浪寬圍國倚蜀青山峭入天
如畫海門堵肘望阿誰教賣釣魚船

東川高僕射

油幢影裏拜清風十里貔貅一片雄三印鎖開霜滿地
四門關定月當空泉浮山葉人家過詔惹爐香鳥道通
新起畫樓攜客上絃歌筵內海榴紅

弔曹監

宅上愁雲吹不散桂林詩骨葬雲根滿樓山色供鄰里
一洞松聲付子孫甘露施衣封淚點秘書取集印苔痕
吟魂醉魄歸何處御水鳴鳴夜遶門

贈長安畢郎中

高門寒沼水連雲鷺識朱衣傍主人地肺半邊晴帶雪
天街一面靜無塵朝迴座客酬琴價衙退留僧寫鶴真
從此幾遷為計相蓬萊三刻奏東巡

寄東蜀幕中友

官亭池碧海榴殷遙想清才倚畫欄柳絮漲天籠地暖
角聲經雨透雲寒曉侵台座香煙濕夜草軍書蠟炬乾
為話門人吟太苦風摧蘭秀一枝殘

曲江漁父

兒孫閒弄雪霜髯浪颭南山影入簷閒卧篷舟龜作枕
病來茅舍網為簾值春遊子憐蓴滑通蜀行人說鱸甜
數尺寒絲一竿竹豈知浮世有猜嫌

上靈州令狐相公

征蠻破虜漢功臣提劍歸來萬里身
笑倚凌烟金柱看形容憔悴老於真

客亭對月

游子離魂隴上花風飄浪卷
遶天涯一年十二度圓月
十一回圓不在家

有寄

愛酒耽棋田處士彈琴詠史賈先生
御溝臨岸有雲石不見鶴來何處行

題浙上人賈島詩卷

賈生詩卷惠休裝百葉蓮花萬里香
供得半年吟不足
長須字字頂司倉

送僧清演歸山

毛褐斜肩背負經
曉思吟入竇山青
峰前野水橫官道
踏着秋天三四星

山居喜友人見訪

入雲晴斲茯苓還
日暮逢迎水石間
看待詩人無別物

半潭秋水一房山

贈青龍印禪師

雨澀秋刀剝雪時
菴前曾禮草堂師
居人昨日相過說
鶴已生孫竹滿池

繡嶺宮詞

春日遲遲春草綠
野棠開盡飄香玉
繡嶺宮前鶴髮翁
猶唱開元太平曲

曹唐

唐字堯賓桂州人初為道士後舉進士不第咸通中累為使府從事

北夢瑣言云唐遊仙詩才情縹緲岳陽守李遠每吟之而思其人唐儀質充偉一日往謁遠遠見之戲曰昔未覩標儀將謂可乘鸞鶴此際接晤竊恐壯水牛亦不勝其載時人聞而笑之

抒情錄人或靳唐嘗作鬼詩使舉所作曰水底有天春寂寂人間無路月茫茫非鬼詩而何唐大哂

近體詩

大遊仙

漢武帝將候西王母下降

崑崙凝想最高峰
王母來乘五色龍
歌聽紫鸞猶縹緲
語來青鳥許從容
風迴水落三清月
漏苦霜傳五夜鐘
樹影悠悠花悄悄
若聞簫管是行蹤

漢武帝於宮中宴西王母

黿岫雲低太一壇
武皇齋潔不勝歡
長生碧字期親署

延壽丹泉許細看劍珮有聲宮樹靜星河無影禁花寒
秋風裊裊月朗朗玉女清歌一夜闌

漢武帝思李夫人

惆悵朱顏不復歸晚秋黃葉滿天飛迎風細荇傳香粉
隔水殘霞見畫衣白玉帳寒鴛夢絕紫陽宮遠雁書稀
夜深池上蘭橈歇斷續歌聲接太微

劉晨阮肇遊天台

樹入天台石路新細雲和雨動無塵烟霞不省生前事

水木空疑夢後身
往往雞鳴巖下月
時時犬吠洞中春
不知此地歸何處
須就桃源問主人

劉阮洞中遇仙子

天和樹色靄蒼蒼
霞重嵐深路渺茫
雲竇滿山無鳥雀
水聲沿澗有笙簧
碧沙洞裏乾坤別
紅樹枝前日月長
願得花間有人出
免令仙犬吠劉郎

仙子送劉阮出洞

殷勤相送出天台
仙境那能却再來
雲液既歸須強飲

玉書無事莫頻開
花當洞口應長在水
到人間定不迴
惆悵溪頭從此別
碧山明月照蒼苔

仙子洞中有懷劉郎

不將清瑟理霓裳
塵夢那知鶴夢長
洞裏有天春寂寂
人間無路月茫茫
玉沙瑤草連溪碧
流水桃花滿澗香
曉露風燈零落盡
此生無處訪劉郎

劉阮再到天台不復見仙子

再到天台訪玉真
青苔白石已成塵
笙歌冥寞閑深洞

雲鶴蕭條絕舊隣
草樹總非前度色
烟霞不似昔年春
桃花流水依然在
不見當時勸酒人

織女懷牛郎

北斗佳人雙淚流
眼穿腸斷為牽牛
封題錦字凝新恨
拋擲金梭織舊愁
桂樹三天雲漠漠
銀河一帶水悠悠
欲將心就仙郎說
借問榆花早晚秋

玉女杜蘭香下嫁於張碩

天上人間兩渺茫
不知誰識杜蘭香
來經玉樹三山遠

去隔銀河一水長
怨入清塵愁錦瑟
酒傾玄露醉瑤觴
遺情更說何珍重
擘破雲鬟金鳳凰

張碩重寄杜蘭香

碧落香銷蘭露秋
星河無夢夜悠悠
靈妃不降三清駕
仙鶴空成萬里愁
皓月隔花追歎別
飛烟籠樹省淹留
人間何事堪惆悵
海色西風十二樓

王遠宴麻姑蔡經宅

好風吹樹杏花香
花下真人道姓王
大篆龍蛇隨筆札

小天星斗滿衣裳間拋南極歸期晚笑指東溟飲興長
要喚麻姑同一醉使人沽酒向餘杭

萼綠華將歸九疑留別許真人

九點秋烟黛色空綠華歸思頗無窮每悲馭鶴身難任
長恨臨霞語未終河影暗吹雲夢月花聲閒落洞庭風
藍絲重勒金條脫留與人間許侍中

穆王宴王母於九光流霞館

桑葉扶疎閉日華穆王邀命宴流霞霓旌著地雲初駐

金奏掀天月欲斜歌咽細風吹粉蕊飲餘清露濕瑤砂
不知白馬紅韁解偷喫東田碧玉花

紫河張休真

琪樹扶疎壓瑞烟玉皇朝客滿花前山川到處成三月
絲竹經時即萬年樹石冥茫初縮地杯盤狼籍未朝天
東風小飲人皆醉從聽黃龍枕水眠

蕭史攜弄玉上昇

豈是丹臺歸路遙紫鸞烟駕不同飄一聲洛水傳幽咽

萬片宮花共寂寥紅粉美人愁未散清華公子笑相邀
緱山碧樹青樓月腸斷春風為玉簫

黃初平將入金華山

莫道真遊煙景賒瀟湘有路入金華溪頭鶴樹春常在
洞口人家日易斜一水暗鳴閒遶澗五雲長往不還家
白羊成隊難收拾喫盡溪邊巨勝花

三年冬大禮

皇帝齋心潔素誠自朝真祖報昇平華山秋草多歸馬

滄海寒波絕洗兵銀箭水殘河影斷玉爐烟盡日華生
千官整肅三天夜劍佩初聞入太清

海日西飛度禁林太清宮殿月沈沈不聞北斗傾堯酒
空覺南風入舜琴歌壓鈞天間夢盡詔歸秋水道情深
雪風更起古杉葉時送步虛清磬音

太一天壇降紫君屬車龍鶴夜成羣春浮玉藻寒初落
露拂金莖曙欲分三代樂迴風入律四溟歌駐水成文
千官不動旌旗下日照南山萬樹雲

山擁飛雲海水清
天壇未夕仗先成
千官不起金縢議
萬國空瞻玉藻聲
禁火曙然香焰裊
宮衣寒拂雪花輕
側聞左右皆周呂
看取從容致太平

南遊

盡興南遊卒未迴
水工舟子不須催
政思碧樹關心句
難放紅螺蘸甲杯
漲海潮生陰火滅
蒼梧風暖瘴雲開
蘆花寂寂月如練
何處笛聲江上來

長安客舍叙邵陵舊宴懷寄永州蕭使君

邵陵樓樹碧蔥蘢
河漢西流宴未終
殘漏五更掀海月
清笳三會揭天風
香薰舞席雲鬟綠
光射散盤蠟燭紅
今日却思行樂處
兩床絲竹水樓中

粉堞彤軒畫障西
水雲紅樹宰璇題
鷓鴣欲絕歌聲定
鷓鴣初驚舞翅齊
坐對玉山難甸線
聽殘金石怕低迷
東風夜月三年飲
不省歸時不似泥

木魚金鑰鎖春城
夜上紅樓縱酒情
竹箭水繁更漏促
桐花風軟管絃清
百分散打銀船溢
十指寬催玉筍輕

星斗漸稀賓客醉碧雲猶戀艷歌聲

三年身逐楚諸侯賓榻容居最上頭飽聽笙歌陪痛飲
熟尋雲樹縱閒遊朱門鎖閉烟嵐暮鈴閣清涼水木秋
月滿前山風不動更邀詩客醉南樓

不知何路學飛翻虛受賢侯鄭重恩午夜清歌敲玉筯
三年洪飲竭金樽招攜每感雙魚遠報答空思一劍存
狼籍梨花滿城月當時長醉信陵門

羽林賈中丞

四十年前百戰身曾驅虎隊掃邊塵風悲鼓角榆關暮
日射旌旗隴草春鐵馬慣牽邀上客金魚多解乞佳人
胷中別有安邊計誰睬髭髯白似銀

暮春戲贈吳端公

年少英雄好丈夫大家望拜執金吾閒眠曉日聽鶗鴂
笑倚春風杖轆轤深院吹笙聞漢婢靜街調馬任奚奴
牡丹花下簾鉤外獨凭紅肌拚虎鬚

贈南嶽馮處士

寂寥深木閉烟霞洞裏相知有幾家
笑看潭魚吹水沫
醉嗔溪鹿喫蕉花
穿厨歷歷泉聲細
繞屋幽幽樹影斜
夜靜着灰封釜竈
自添文武養丹砂

白日溪邊自結廬
風泉滿院稱幽居
鳥啼深樹斲靈藥
花落閒窓看道書
烟嵐晚過鹿裘溼
水月夜明山舍虛
支頤冷笑緣名出
終日王門强曳裾

奉送嚴大夫再領容州

海風卷樹凍嵐消
憂國寧辭嶺外遙
自顧勤勞甘百戰

不將功業負三朝
劍澄黑水曾芟虎
箭劈黃雲慣射鵬
代北天南盡成事
肯將心許霍嫖姚

日照雙旌射火山
笑迎賓從却南還
風雲暗發詠諧外
感會潛生氣槩間
蘄竹水翻臺榭溼
刺桐花落管絃閒
無因得鞞真珠履
親從新侯定八蠻

送康祭酒赴輪臺

灞水橋邊酒一杯
送君千里赴輪臺
霜黏海眼旗聲凍
風射犀文甲縫開
斷磧簇烟山似米
野營軒地鼓如雷

分明會得將軍意不斬樓蘭不擬迴

送劉尊師祇詔闕庭

海風葉葉駕霓旌天路悠悠接上清
錦誥淒涼遺去恨玉簫哀絕醉離情
五湖夜月幡幢濕雙闕清風劍珮輕
從此暫辭華表柱更應千載是歸程

仙老閒眠碧草堂帝書徵入白雲鄉
龜臺欲署長生籍鸞殿邀論不死方
莖露想傾延命酒素烟思熟降真香
五千言外無文字更有何詞贈武皇

送羽人王錫歸羅浮

風前整頓紫荷巾
歸向羅浮保養神
石磴倚天行帶月
鐵橋通海入無塵
龍蛇出洞間邀雨
犀象眠花不避人
最愛葛洪尋藥處
露苗烟蕊滿山春

哭陷邊許兵馬使

北風裂地黯邊霜
戰敗桑乾日色黃
故國暗迴殘士卒
新墳空葬舊衣裳
散牽細馬嘶青草
任去佳人弔白楊
除却陰符與兵法
更無異物在儀牀

和周侍御買劍

將軍溢價買吳鉤要與中原靜寇讐
試掛牕前驚電轉略拋牀下怕泉流
青天露拔雲霓泣黑地潛擎鬼魅愁
見說夜深星斗畔等閒期尅月支頭

題子姪書院雙松

自種雙松費幾錢頓令院落似秋天
能藏此地新晴雨却惹空山舊燒烟
枝壓細風過枕上影籠殘月到窻前
莫教取次成閒夢使汝悠悠十八年

三國志丁公固幼時夢松生其腹謂

人曰松字乃十八公也後十八年吾其為公乎卒如夢兆

病馬

綠耳何年別渥洼病來顏色半塵沙
四蹄不鑿金砧裂
雙眼慵開玉筋斜
墮月兔毛乾
殼觿失雲龍骨瘦查牙
平原好放無人放
嘶向秋風苜蓿花

墮上沙葱葉正齊
騰黃猶自跼羸蹄
尾蟠夜雨紅絲脆
頭掉秋風白練低
力憊未思金絡腦
影寒空望錦障泥
堦前莫怪垂雙淚
不遇孫陽不敢嘶

不剪焦毛鬣半翻何人別是古龍孫風吹病骨無驕氣
土蝕驄花見卧痕未噴斷雲歸漢苑曾追輕練過吳門
一朝千里心猶在爭肯潛忘秣飼恩

空被秋風吹病毛無因濯浪刷洪濤卧來總怪龍蹄跂
瘦盡誰驚虎口高追電有心猶款段逢人相骨強嘶號
欲將鬚鬣重裁剪乞借新城利鉸刀

病久無人着意看五花毛色欲凋殘飲驚白露泉花冷
喫怕清風豆葉寒長檐敢辭紅錦重舊韁寧畏紫絲蟠

王良若許相擡策千里追風也不難

小遊仙

玉簫金瑟發商聲桑葉乾枯海水清
淨掃蓬萊山上地
略邀王母話長生

南斗闌珊北斗稀茅君夜著紫霞衣
朝騎白鹿趨朝去
鳳押笙歌逐後飛

焚香獨自上天壇桂樹風吹玉簡寒
長怕嵇康乏仙骨
與將仙籍再尋看

冰屋朱扉曉未開誰將金策扣瓊臺
碧花紅尾小仙犬
閒吠五雲嗔客來

白石山中自有天竹花藤葉滿溪
烟朝來洞口圍碁了
睹得青龍值幾錢

玉詔新除沈侍郎便分茅土鎮東方
不知今夕遊何處
侍從皆騎白鳳凰

饑即餐霞悶即行一聲長嘯萬山青
穿花渡水來相訪
珍重多才阮步兵

東妃閒著翠霞裙自領笙歌出五雲清思密談誰第一
不過邀取小茅君

九天天路入雲長燕使何由到上方玉女暗來花下立
手接裙帶問昭王

玉皇賜妾紫衣裳交向桃源嫁阮郎爛煮瓊花勸君喫
恐君毛鬢暗成霜

玉色雌龍金絡頭真妃騎出縱閒遊崑崙山上桃花底
一曲商歌天地秋

閒來洞口等劉君
緩步輕臺玉線裙
旋擘桃花擲流水
更無言語倚彤雲

西漢夫人下太虛
九霞裙幅五雲輿
欲將碧字相教示
自解盤囊出素書

八景風回五鳳車
崑崙山上看桃花
若教使者沽春酒
須覓餘杭阿母家

碧瓦彤軒月殿開
九天花落瑞風來
玉皇欲著紅龍袂
親喚金妃下手裁

且欲留君飲桂漿九天無事莫推忙
青龍舉步行千里
休道蓬萊歸路長

侍女親擎玉酒卮滿卮傾酒勸安期
等閒相別三千歲
長憶水邊分棗時

去住樓臺一任風十三天洞暗通行
厨侍女炊何物
滿竈無烟玉炭紅

風動閒天清桂陰水晶簾外冷沈沈
西妃少女多春思
斜倚彤雲盡日吟

王母相留不放回偶然沈醉卧瑤臺憑君與向蕭郎道
教著青龍取妾來

方士飛軒駐碧霞酒香風冷月初斜不知誰唱春歸曲
落盡溪頭白葛花

方朔歸來到我家欲將靈樹出丹霞三千年後知誰在
擬種紅桃待放花

水滿桑田白日沈凍雲乾霰濕重陰遼東歸客閒相過
因話堯年雪更深

笑擎雲液紫瑤觥共請雲和碧玉笙花下偶然吹一曲
人間因識董雙成

樹下星沈月欲高前溪水影溼龍毛洞天雲冷玉花發
公子盡披雙錦袍

武皇含笑把金觥更請霓裳一兩聲護帳宮人最年少
舞腰時挈繡裙輕

瓊樹扶疎壓瑞烟玉皇朝客滿花前東風小飲人皆醉
短尾青龍枕水眠

彤閣鐘鳴碧鷺飛
皇君催慰紫霞衣
丹房玉女心慵甚
貪看投壺不肯歸

沙野先生閉玉虛
焚香夜寫紫微書
供承童子閒無事
教劉瓊花餵白驢

青童傳語便須回
報道麻姑玉蕊開
滄海成塵等閒事
且乘龍鶴看花來

洞裏月明瓊樹風
畫簾青室影朦朧
香殘酒冷玉妃睡
不覺七真歸海中

東溟兩渡作塵飛一萬年來會面稀
千樹梨花百壺酒共君論飲莫論詩

北斗西風吹白榆穆公相笑夜投壺
花前玉女來相問賭得青龍許贖無

八海風涼水影高上卿教製赤霜袍
蛟絲玉線難裁割須借玉妃金剪刀

絳闕夫人下北方細環清珮響丁當
攀花笑入春風裏偷折紅桃寄阮郎

御定全唐詩錄卷九十五

欽定四庫全書

御定全唐詩錄卷九十六

張蠊

蠊字象文清河人初與許崇張喬齊名登乾寧進士第為校書郎櫟陽尉犀浦令王建開國拜膳部員外郎後為金堂令王衍與徐后遊大慈寺見壁間書牆頭細雨垂纖草水面回風聚落花愛之問知蠊句給札令以詩進蠊以二百首獻衍頗重之

將召為知制誥宋光嗣以其輕傲止之僅賜白金而罷蟻生而穎秀幼能為詩作登單于臺有白日地中出黃河天外來之句為世所稱

徐獻忠曰蟻詩稍通格調力去補衲之弊遂不復用事然天才本少英旨未奇至於寫物象情乃多

肖似

近體詩

過蕭關

出得蕭關北，儒衣不稱身。
隴狐來試客，沙鷗下欺人。
曉戍殘衙火，晴原起獵塵。
邊戎莫相忌，非是霍家親。

登單于臺

邊兵春盡迴，獨上單于臺。
白日地中出，黃河天外來。
沙翻痕似浪，風急響疑雷。
欲向陰關度，陰關曉不開。

和崔監丞春遊鄭僕射東園

春興隨花盡，東園自養閒。
不離三畝地，似入萬重山。
白鳥穿蘿去，清泉抵石還。
豈同秦代客，無位隱商顏。

宿山驛

驛在千峰裡寒宵獨此身古墳時見火荒壁悄無隣月
白翻驚鳥雲間欲就人祇應明日鬢更與老相親

雲朔逢山友

會面却生疑居然似夢歸塞深行客少家遠識人稀戰
馬分旗牧驚禽曳箭飛將軍雖異禮難便脫麻衣

邊將

歷戰燕然北功高劍有威聞名敵國懼輕命故人稀角

怨星芒動塵愁日色微從為漢都護未得脫征衣
按劍立城樓西看極海頭承家為上將開地得邊州磧
迴兵難伏天寒馬易收朔風一度臘吹裂錦貂裘

贈聞一上人

見面雖年少聞名似白頭玄談窮釋旨清思掩詩流果
落痕生砌松高影上樓壇場在三殿應召入焚修

贈道者

得道疑人識都城獨閉關頭從白後黑心向鬧中間饑

渴惟調氣兒孫亦駐顏始知仙者隱殊不在深山

寄友人

戀道欲何如東西遠索居長疑即見面翻致久無書
旬麥深藏雉淮苔淺露魚相思不我會明月屢盈虛

寄太白禪師

何年萬仞頂獨有坐禪僧客上應無路人傳或見燈
齋厨惟有椽講石任生藤遙想東林社如師誰復能

送縉雲尉

釋褐從仙尉之官興若何去程唯水石公署在雲蘿野
阪樓中迴晴峰案上多三年罷趨府應更戰高科

和友人送趙能卿東歸

一第時難得歸期日已過相看玄鬢少共憶白雲多楚
濶天垂草吳空月上波無人不可遇之子獨狂歌

送友人歸武陵

聞近桃源住無村不是花戍旗招海客廟鼓集江鴉別
島垂橙實閒田長荻芽遊秦未得意看即更離家

弔孟浩然

每每樵家說孤墳亦夜吟若重生此世應更苦前心
與襄陽遠詩同漢水深親栽鹿門樹猶蓋石牀陰

送南海僧遊蜀

真修絕故鄉一衲度暄涼此世能先覺他生豈再忘
定中船過海臘後路沿湘野迴鴉隨笠山深虎背囊
瀑流垂石室蘿蔓蓋銅梁却後何年會西方有上房

和友人許棠題宣平里古藤

欲結千年茂生來便近松
迸根通井潤交葉覆庭穠
歷代頻更主盤空漸變龍
畫風圓影亂宵雨細聲重
益密勝丹桂層危類遠峰
嫩條懸野鼠枯節叫秋蛩
翠老霜難蝕皺多蘚乍封
幾家遙共翫何寺不堪容
客對忘離榻僧看誤過鐘
頃因陪預作終夕遶枝筇

長安春望

明時不敢卧烟霞又見秦城換物華
殘雪未消雙鳳闕新春已發五侯家
甘貧祇擬長緘酒忍病猶期強探花

故國別來桑柘盡十年兵踐海西涯

言懷

十上升沈覺自非賤身元合衣荷衣豈能得路陪先達
却擬還家望少微戰馬到秋長淚落傷禽無夜不魂飛
平生祇學穿楊箭更向何門是見機

夏日題老將林亭

百戰功成翻愛靜侯門漸欲似仙家牆頭雨細垂纖草
水面風迴聚落花井放轆轤閒浸酒籠開鸚鵡報煎茶

幾人圖在凌烟閣曾不交鋒向塞沙

宴駙馬宅

牙香禁樂鎮相攜日日君恩降紫泥紅藥院深人半醉
綠楊門掩馬頻嘶座中古物多仙意壁上新詩有御題
別向庭蕪寘吟石不教宮妓踏成蹊

錢塘夜宴留別郡守

四方騷動一州安夜列罇罍伴客懽
感栗調高山閣迴
蝦蟆更促海城寒

郝天挺云江南以木柝警夜曰蝦蟆更

屏間佩響藏歌

妓幕外刀光立從官沈醉不愁歸棹遠曉帆吹上子陵灘

贈李司徒

承家拓定隴關西勳貴名應上將齊金庫夜開龍甲冷
玉堂秋閉鳳笙低歡筵每恕嬌娥醉閒榼猶驚戰馬嘶
長怪魯儒頭枉白不親弓劍覓丹梯

贈九江太守

江頭暫駐木蘭船漁父來誇太守賢三邑旋添新戶口

四營漸廢舊戈鋌
笙歌不似經荒後
禮樂猶如未戰前
昨日西亭從游騎
信旗風裏說詩篇

逢道者

縱意出山無遠近
還如孤鶴在空虛
昔年親種樹皆老
此世相逢人自疎
野葉細苞深洞藥
巖藤閒束古仙書
終尋隱跡歸何處
方說烟霞不定居

贈段逸人

長筇自擔藥兼琴
話著名山即擬尋
從聽世人權似火

不能燒得卧雲心

別鄭仁表

春來醉別鏡湖邊
官顯才狂正少年
紅燭滿汀歌舞散
美人迎上木蘭船

青塚

傾國可能勝効國
無勞冥寞更思回
太真雖是承恩死
祇作飛塵向馬嵬

歐陽炯

烟益州華陽人少事王衍為中書舍人孟蜀廣政
中拜翰林學士歷門下侍郎平章事後從昶歸宋
性坦率守儉素好為歌詩嘗擬白氏諷諫五十篇
獻昶昶嘉賞之

古體詩

貫休應夢羅漢畫歌

西嶽高僧名貫休孤情峭拔凌清秋天教水墨畫羅漢
魁岸古容生筆頭時捐大絹泥高壁閉目焚香坐禪室

闕然夢裡見真儀脫下袈裟點神筆高握節腕當空擲
憲宰毫端任狂逸逡巡便是兩三軀不似畫工虛費日
怪石安排嵌復枯真僧列坐連跏趺形如瘦鶴精神健
頂似伏犀頭骨麤倚松根傍巖縫曲錄腰身長欲動看
經弟子擬聞聲瞌睡山童疑有夢不知夏臘幾多年一
手撐頤偏袒肩口開或若共人語身定復疑初坐禪案
前卧象低垂鼻崖畔戲猿斜展臂芭蕉花裏刷輕紅苔
蘚文中暈深翠硬筇杖矮松床雪色眉毛一寸長繩開

梵夾兩三片線補衲衣千萬行林間亂葉紛紛墮一印
殘香斷烟火皮穿木屐不曾拖笋織蒲團鎮長坐休公
休公逸藝無人加聲譽喧喧遍海涯五七字句一千首
大小篆書三十家唐朝歷歷多名士蕭子雲兼吳道子
若將書畫比休公只恐當時浪生死休公休公始自江
南來入秦於今到蜀無交親詩名畫手皆奇絕覩你凡
人爭是人瓦棺寺裏維摩詰舍衛城中辟支佛若將此
畫比量看總在人間為第一

黃休復益州名畫錄云貫
休能詩善書畫王氏建國

時居蜀中龍華寺縱筆畫水墨羅漢一十六身并一佛
二大士巨石縈雲枯松帶蔓諸古貌與他人畫不同或
云夢中所睹覺後圓之謂之應夢羅漢蜀主宣入內歎
其筆跡狂逸供養經月却令付院中炯時在翰林曾觀
之贈
以歌

題景煥畫應天寺壁天王歌

錦城東北黃金地故跡何人興此寺白眉長老重名公
曾識會稽山處士寺門左壁圖天王威儀部從來何方
鬼神怪異滿壁走當簷颭颭生秋光我聞天王分理四
天下水晶宮殿琉璃瓦綵仗時驅狻猊裝金鞭頻策騏

驎馬毗沙大像何光輝手擎巨塔凌雲飛地神對出寶
餅子天女倒披金縷衣唐朝說著名公畫周昉毫端善
圖寫張僧繇是有神人吳道子稱無敵者奇哉妙手傳
孫公能於此地留神蹤斜窺小鬼怒雙目直倚越狼高
半冒寶冠動總生威容趨蹌左右來傾恭臂橫鷹爪尖
纖利腰纏虎皮斑剝紅飄飄但恐入雲中步驟還疑歸
海東蟒蛇拖得渾身墮精魅搦來雙眼空當時此藝實
難有鎮在寶坊稱不朽東邊畫了空西邊留與後人教

敵手後人見者皆心驚盡為名公不敢爭誰知未滿三十載或有異人來間生匡山處士名稱朴頭骨高奇連五嶽曾持象簡累為官又有蛇珠常在握昔年長老遇奇蹤今日門師識景公興來便請泥高壁亂搶筆頭如疾風逡巡隊伍何顛逸散漫奇形皆湧出交加器械滿虛空兩面劃然如鬪敵聖王怒色覽東西劍刃一揮皆整齊腕頭獅子咬金甲脚底夜叉繫絡鞵馬頭壯健多筋節烏觜彎環如屈鐵遍身虵虺亂縱橫遶頷髑髏乾

子裂眉麤眼豎髮如錐怪異令人不可知科頭巨卒欲
生鬼半面女郎安小兒况聞此寺初興置地脈沈沈當
正氣如何請得二山人下筆咸成千古事君不見明皇
天寶年畫龍致雨非偶然包含萬象藏心裡變現百般
生眼前後來畫品列名賢唯此二人堪比肩人間是物
皆求得此樣欲於何處傳嘗憂壁底生雲霧揭起寺門

天上去

僖宗時會稽處士孫位隨駕至蜀于應天寺門
左壁上畫天王一座筆勢狂縱三十餘年無有

敵者景煥善書畫與烟為忘形交一日同遊茲寺畫右
壁天王以對之烟為歌行一篇以紀有草書僧夢龜書

之廊壁上成都人
號為應天三絕

李中

中字有中九江人仕南唐登仕郎守新淦縣令

近體詩

經古寺

殿宇半隳摧門臨野水開雲凝何代樹草蔽此時臺
遶塔堆黃葉沿階積綠苔踟躕日將暮栖鳥入巢來

得故人消息

多難分離久相思每淚垂夢歸殘月曉信到落花時未
必乖良會何當有後期那堪樓上望烟水接天涯

寄劉鈞秀才

掩戶當春晝知君志在詩閒花半落處幽客未來時野
鳥穿沙逕江雲過竹籬會須明月夜與子水邊期

寄廬山白大師

長憶尋師處東林寓泊時一秋同看月無夜不論詩泉
美茶香異堂深磬韻遲鹿馴眠蘚逕猿苦叫霜枝別後

音塵隔年來鬢髮衰趨名方汲汲未果再遊期

江邊吟

風暖汀洲吟興生
遠山如畫雨新晴
殘陽影裏水東注
芳草烟中人獨行
閃閃酒帘招醉客
深深綠樹隱啼鶯
盤桓漁舍忘歸去
雲靜高空月又明

海上從事秋日書懷

悠悠旅宦役塵埃
舊業那堪信未迴
千里夢隨殘月斷
一聲蟬送早秋來
壺傾濁酒終難醉
匣鎖青萍久不開

唯有搜吟遣懷抱涼風時復上高臺

思九江舊居

結茅曾在碧江隈多病貧身養拙來
兩歇汀洲垂釣去月當門巷訪僧迴
靜臨窻下開琴匣悶向牀頭潑酒醅
遊宦等閒千里隔空餘魂夢到漁臺

門前烟水似瀟湘放曠優游興味長
虛閣靜眠聽遠浪扁舟閒上泛殘陽
鶴翹碧蘚庭除冷竹引清風枕簟涼
犬吠疎籬明月上鄰翁攜酒到茅堂

無機終日狎沙鷗得意高吟景且幽檻底江流偏稱月
簷前山朶最宜秋遙村處處吹橫笛曲岸家家繫小舟
別後再遊心未遂設屏惟畫白蘋洲

寄左偃

蕭條陋巷綠苔侵何事君心似我心貧戶懶開元愛靜
病身纔起便思吟閒留好鳥庭柯密暗養鳴蛩砌草深
況是清朝重文物無愁當路少知音

竹

森森移得自山莊直向空庭野興長
便有好風來枕簟更無閒夢到瀟湘
塵來砌蘚經疎雨引下溪禽帶夕陽
閒約羽人同賞處安排碁局就清涼

和潯陽宰感舊

追感古今情不已竹軒閒取史書看
欲親往哲無因見空樹臨風襟袖寒

潯陽物景真難及練寫澄江最好看
曾上虛樓吟倚檻五峰擎雪照人寒

思朐陽春遊感舊寄柴司徒

南陌風和舞蝶狂
惜春公子戀斜陽
高歌飲罷將迴轡
衣上花兼百草香

春郊飲散暮烟收
却引絲簧上翠樓
紅袖歌長金管亂
銀蟾飛出海東頭

柳

春來無樹不青青
似共東風別有情
閒憶舊居湓水畔
數枝烟雨屬啼鶯

子規

暮春滴血一聲聲
花落年年不忍聽
帶月莫啼江畔樹
酒醒遊子在離亭

牛嶠

嶠字松卿一字延峰
僧孺之孫博學有文
以歌詩著名乾符五
年第進士歷遺補尚
書郎王建鎮蜀辟判
官及僭位為給事中

近體詩

楊柳枝

解凍風來陌上青
解垂羅袖拜卿卿
無端裏娜臨官路
舞送行人過一生

吳王宮裏色偏深
一簇纖條萬縷金
不憤錢塘蘇小小

引郎松下結同心


丹鉛總錄云因咏柳而
貶松所謂尊題格也

橋北橋南千萬條
恨伊張緒不相饒
金羈白馬臨風望
認得羊家靜婉腰

狂雪隨風撲馬飛
惹烟無力被春欺
莫教移入靈和殿

宮女三千又妬伊

裏翠籠烟拂暖波舞裙新染麴塵羅
章華臺畔隋堤上
傍得春風爾許多



御定全唐詩錄卷九十六

欽定四庫全書

集部

御定全唐詩錄卷九十八

詳校官左中允_臣 瑋五珠

主事銜_臣 徐以坤復勘

總校官原任中允_臣 王燕緒

校對官中書_臣 王鍾泰

謄錄監生_臣 閻學朱

謄錄監生_臣 劉禮

欽定四庫全書

御定全唐詩錄卷九十七

黃滔

滔字文江莆田人乾寧二年擢進士第光化中守
四門博士王審知據閩充武威軍節度推官監察
御史裏行幕府應用文及塔廟碑碣半出其手中
州人士避地者亦多主於滔云

洪邁云滔詩清淳丰潤若與人對話和氣郁郁有

貞元長慶風概

楊萬里云詩至晚唐益工滔詩如寺寒三伏雨松
偃數朝枝如青山寒帶雨古木夜啼猿又如聞雁
之一聲初觸夢半白已侵頭與韓致光吳融輩並
遊未知孰先

古體詩

賈客

大舟有深利滄海無淺波利深波也深君意竟如何鯨

鯢齒上路何如少經過

近體詩

退居

老歸江上村孤寂欲何言
世亂時人物家貧後子孫
青山寒帶雨古木夜啼猿
惆悵西川舉戎裝度劍門

冬暮山舍喜標上人見訪

寂寞三冬杪深居業盡拋
逕松開雪後砌竹忽僧敲
茗汲水消溜鑪燒鵲去巢
共談慵僻意微日下林梢

遊東林寺

平生愛山水下馬虎溪時已到終嫌晚重遊預作期寺
寒三伏雨松偃數朝枝翻譯如曾見白蓮開舊池

書崔少府居

文苑英華作
贈李補闕

魯史蜀琴旁陶然舉一觴夕陽明島嶼秋水淺池塘世
亂憐官替家貧值歲荒前峰亦曾宿知有辟寒方

敷水盧校書

九霄無詔下何事近清塵宅帶松蘿僻日唯猿鳥親吟

高仙掌月期有洞庭人莫問烟霞句懸知見嶽神

寄湘中鄭明府

縣與白雲連滄洲况縣前嶽僧同夜坐江月看秋圓琴
拂莎庭石茶擔乳洞泉莫耽雲水興疲俗待君痊

送李山人往湘中

漢渚往湘川乘流入遠天新秋無岼水明月有琴船露
坐應通曉萍居恐隔年嶽峰千萬仞知上嘯猿巔

壺公山

古老相傳古仙姓陳名壺
公於此山成道因而名焉

八面峰巒秀孤高可偶然數人遊頂上滄海見東邊不

信無靈洞相傳有古仙橘如珠夏在池象月垂穿

山頭有池

而圓兼橘樹
朱實夏在

髣髴嘗聞樂峇峽半插天山寒徹三伏松

偃出千年樵牧時迷所倉箱歲疊川嚴祠風雨管怪木

薜蘿纏青草方中藥蒼苔石裏錢瓊津流乳竇春色駐

芝田烏兔中時近龍蛇蟄處臙嘉名光列土秀氣產羣

賢瀑鏤瑤臺路溪昇釣浦船鼃頭擎恐沒地軸壓應旋

蠲疾寒甘露藏珍起瑞烟畫工飛夢寐詩客寄林泉掘

地多雲母緣霜欠木綿井通鱖吐脈僧隔虎棲禪

山間有井

通海盈縮之候貞元中有僧號法通咸通中有僧號弘播於其絕頂獨禪昏行至降虎而法通曾下山遇兩虎爭一牛乃叱而隔之分令各啖之危磴千尋拔奇花四季鮮鶴歸玄圃

少鳳下碧梧偏桃易炎涼熟茶推醉醒煎村家蒙棗栗俗骨爽猿蟬谷語昇喬鳥陂開共蒂蓮落楓丹葉舞新蕨紫芽拳翠竹雕羌笛懸藤煮蜀牋白雲長掩映流水

別潺湲作賦前儒闕冲虛南國先省郎求牧看野老葺

齋眠

潘郎中存實詩云雙旌放青源吟看壺公翠又歐陽矩先輩自闕刺史蘇君書求泉山之為畫屏

云壺公之高洛陽之深夢魂所思

寺歷興衰創碑頽一二鐫清吟思却

隱簪紱奈縈牽

寄獻梓潼山侯侍郎

時常拾遺諫諍

漢宮行廟略簪笏落民間直道三湘水高情四皓山
賜衣僧脫去奏表主批還地得松蘿塢泉通雨雪灣
東門添故事南省缺新班

有新命不起

片石秋從露幽窓夜不關

夢餘蟾隱映吟次鳥綿蠻可惜相如作當時事悉閒

河南府試秋夕聞新雁

湘南飛去日，薊北乍驚秋。
叫出隴雲夜，聞為客子愁。
一聲初觸夢，半白已侵頭。
旅館移欹枕，江城起倚樓。
餘燈依古壁，片月下滄洲。
寂聽良宵徹，躊躇感歲流。

塞上

塞門關外日光微，角怨單于鴈駐飛。
衝水路從冰解斷，踰城人到月明歸。
燕山臘雪銷金甲，秦苑秋風脆錦衣。
欲弔昭君倍惆悵，漢家甥舅竟相違。

足馬蕭蕭去不前，平蕪千里見窮邊。
關山色死深秋日，

鼓角聲沈霜重天荒骨或銜殘鐵露驚風時掠暮沙旋
隴頭冤氣無歸處化作陰雲飛杳然

嚴陵釣臺

終向烟霞作野夫一竿竹不換簪裾直鉤猶逐熊羆起
獨是先生真釣魚

周朴

朴字太朴吳興人避地福州寄食烏石山僧寺喜
吟詩構思苦澁得句忻然自快人或戲弄之弗顧

也黃巢寇閩欲降之曰我尚不仕天子豈從賊遂
見害

紀事云朴在閩假僧人丈室以居不飲酒茹葷每
諸僧食朴攜孟廁其下而食以為常有設供施僧
錢者亦拱手丐其一錢或以三數錢與之止受其
一得錢備茶藥費將盡復然僧徒亦未嘗厭也朴
苦吟每遇景晦搜抉日旰忘返嘗野逢一負薪者
忽持之且厲聲曰我得之矣我得之矣其人掣手臂

驚走遇遊徼卒疑為偷兒執而訊之朴徐告之曰
我見彼適得句耳得釋去蓋賦古墓詩少落句偶
見樵者遂足成云子孫何處閒為客松柏被人伐
作薪朴嘗有禹力不到處河聲流向西之句恒自
稱譽有一士跨驢行偶遇朴佯誦西為東促驢去
朴直追數里挽而告之曰此予詩向西乃佳東即
誤矣閩中傳以為笑

閩志朴與烏石僧靈觀雙峰法主大為嬾安為禪

悅之交巢殺朴有頸湧白乳之異宋紹興賜祠烏
石祀朴額曰剛顯云

歐陽公詩話云唐晚年詩人無復李杜豪放之格
然亦務以精意相高如周朴者構思尤艱每有所
得必極其雕琢故時人稱朴詩月鍛年鍊未及成
篇已播人口其名重當時如此余少時猶見其集
今不復傳矣

近體詩

邊思

年高來遠戍白首罷干戎
夜色薊門火秋聲邊塞風
磧浮悲老馬月滿引新弓
百戰山陰去唯添上將雄

董嶺水

湖州安吉縣門與白雲齊
禹力不到處河聲流向西
去衙山色遠近水月光低
中有高人在沙中曳杖藜

王霸壇

王君上昇處信首古居前
早樹即須朽白龜應亦全
雲

間猶一日塵裏已千年碧色壇如黛時人誰可仙

宿玉泉寺

野寺度殘夏空房欲暮時夜聽猿不睡秋思客先知竹
迴煙生薄山高月上遲又登塵路去難與老僧期

次梧州却寄永州使君

隨風身不定今夜在蒼梧客淚有時有猿聲無處無潮
添瘴海潤烟拂太山孤却憶零陵住吟詩半玉壺

秋夜不寐寄崔溫進士

愁多難得寐展轉讀書牀不是旅人病豈知秋夜長歸鄉憑遠夢無夢更思鄉枕上移窻月分明是淚光

哭陳庾

繫馬向山立一杯聊奠君野烟孤客路寒草故人墳琴韻歸流水詩情寄白雲日斜休哭後松韻不堪聞

春日秦國懷古

荒郊一望欲消魂涇水縈紆傍遠村牛馬放多春草盡原田耕破古碑存雲和積雪蒼山晚烟伴殘陽綠樹昏

數里黃沙行客路不堪回首思秦原

桐柏觀

東南一境清心目有此千峰插翠微人在下方衝月上
鶴從高處破烟飛巖深水落寒侵骨門靜花開色照衣
欲識蓬萊今便是更於何處學忘機

塞上曲

一隊風來一隊沙有人行處沒人家黃河九曲水先合
紫塞三春不見花

孟賓于

賓于字國儀連州人少孤力學自湖湘赴洛應舉
天福九年登第還鄉為馬氏從事後歸南唐為塗
陽令坐繫赦歸後主起為水部員外致仕初居吉
州玉笥山自號羣玉峰叟後還連上有金鰲集二
卷

馬令南唐書云李若虛侍郎廉察沅湘賓于以詩
數百篇獻之若虛採警策數聯譽諸朝廷由是詩

名益振

王禹偁嘗云古詩人有三水部謂何遜張籍及賓
于也

近體詩

懷連上舊居

閒思連上景難齊樹遶仙鄉路遶溪明月夜舟漁父唱
春風平野鷓鴣啼城邊寄信歸雲外花下傾杯到日西
更憶海陽垂釣侶昔年相遇草萋萋

下第詩

失意從他桃李春
嵩陽經過歇行塵
雲僧不見城中事
問是今年第幾人

獻主司

六舉
登第

那堪雨後更聞蟬
溪隔重湖路七千
憶昔故園楊柳岸
全家送上渡頭船
主司得詩自謂得賓于之晚後賓于致仕歸連上過廬陵吉守贈詩有今

日還家莫惆悵不同
初上渡頭船用此

張泌

泌淮南人初官句容尉上書言治道後主徵為監
察御史官至內史舍人入宋後歸家毗陵詩一卷
後主壬申歲泌知貢舉試天雞弄和風泌但以文
選中詩句為題未嘗詳究有進士白云爾雅翰天
雞鶡天雞未知孰是泌大驚不能對亟取爾雅檢
一在釋蟲一在釋鳥果有二因自失放進士三人
學士張洎言泌多遺復命洎試放五人金陵破後
主以藏金私遺近臣辨裝泌得金二百詣曹彬陳

首請奏其事彬薄之以金輸官而不以聞

古體詩

春晚謠

雨微微烟霏霏小庭半折紅薔薇
鈿箏斜倚畫屏曲零落幾行金雁飛
蕭關夢斷無尋處萬疊春波起南浦
凌亂楊花撲繡簾晚牕時有流鶯語

春江雨

雨溟溟風泠泠老松瘦竹臨烟汀
空江冷落野雲重雲

中孤月微如星夜驚溪上漁人起滴瀝蓬蓬聲滿愁耳子
規叫斷獨未眠卷岼春濤打船尾

近體詩

碧戶

碧戶扃魚鑲蘭牕掩鏡臺落花疑悵望歸燕自徘徊咏
絮知難敵傷春不易裁恨從芳草起愁為晚風來衣惹
湘雲薄眉分楚岫開香濃眠舊枕夢好醉春杯小障明
金鳳幽屏點翠苔寶箏橫塞雁怨笛落江梅卓氏仍多

酒相如正富才莫教琴上意翻作鶴聲哀

惆悵吟

秋風丹葉動荒城慘澹雲遮日半明
晝夢却因惆悵得晚愁多為別離生
江淹彩筆空留恨莊叟玄譚未及情
千古怨魂消不得一江寒浪若為平

春夕言懷

風透疎簾月滿庭倚闌無事倍傷情
烟垂柳帶纖腰軟露滴花房怨臉明
愁逐野雲銷不盡情隨春浪去難平

幽牕漫結相思夢欲化西園蝶未成

長安道中蚤行

客離孤館一燈殘
牢落星河欲曙天
雞唱未沈函谷月
鴈聲新度灞陵烟
浮生已悟莊周夢
壯志仍輸祖逖鞭
何事悠悠策羸馬
此中辛苦過流年

秋晚過洞庭

征帆高掛酒初酣
莫景離情兩不堪
千里晚霞雲夢北
一洲霜橘洞庭南
溪風送雨過秋寺
磴石驚泉落夜潭

莫把羈魂弔湘魄九疑愁絕鎖烟嵐

洞庭阻風

一作許棠

空江浩蕩景蕭然盡日菰蒲泊釣船
青草浪高三月渡綠楊花撲一溪烟
情多莫舉傷春目愁極兼無買酒錢
猶有漁人數家住不成村落夕陽邊

春日旅泊桂州

曉風芳草竟芊綿多病多愁負少年
弱柳未勝寒食雨好花爭奈夕陽天
溪邊物色宜圖畫林畔鶯聲似管絃

獨有離人開淚眼，強憑杯酒亦潸然。

晚次湘源縣

烟郭遙聞向晚雞，水平舟靜浪聲齊。
高林帶雨楊梅熟，曲岬籠雲謝豹啼。
二女廟荒汀樹老，九疑山碧楚天低。
湘南自古多離怨，莫動哀吟易慘悽。

邊上

戍樓吹角起征鴻，獵獵寒旌背晚風。
千里暮烟愁不盡，一川秋草恨無窮。
山河慘澹關城閉，人物蕭條市井空。

只此旅魂招未得更堪回首夕陽中

題華嚴寺木塔

六街晴色動秋光雨霽憑高只自傷一曲晚烟浮渭水
半橋斜日照咸陽休將世路悲塵事莫指雲山認故鄉
回首漢宮樓閣暮數聲鐘鼓自微茫

芍藥

香清粉澹怨殘春蝶翅蜂鬚戀蕊塵閒倚晚風生悵望
靜留遲日學因循休將薜荔為青瑣好與玫瑰作近鄰

零落若教為暮雨又應愁殺別離人

經舊遊

暫別高唐曉又還丁香結夢水潺潺不知雲雨歸何處
歷歷空留十二山

寄人

別夢依依到謝家小廊回合曲闌斜多情只有春庭月
猶為離人照落花

酷憐風月為多情還到春時別恨生倚柱尋思倍惆悵

一場春夢不分明

于鄴

鄴唐末進士五代唐明宗時有于鄴除工部郎中
時尚書盧文紀諱業甚不平陶鑄欲請換曹其夕
鄴醉忿自經盧坐貶

近體詩

秋夕聞鴈

星漢欲沈盡誰家砧未休忽聞涼雁至如報杜陵秋千

樹又黃葉幾人新白頭洞庭今夜客一半却登舟

感情

青山長寂寞南望獨高歌四海故人盡九原新壠多西
沈浮世日東流逝川波不使年華駐此生看幾何

陸希聲

希聲吳人博學善屬文尤工書初隱義興後應召
累歙州刺史相昭宗在位無所輕重以太子太師
罷

近體詩

寄詈光上人

筆下龍蛇似有神
天池雷雨變逡巡
寄言昔日不龜手

應念江湖并避人

紀事云古之善書鮮有得筆法者希聲得之凡五事撇押鉤格抵用筆雙

鉤則點畫遒勁而盡妙矣謂之撥鐙法希聲自言昔二王皆傳此法至陽水亦得之希聲以授沙門詈光詈光入長安為翰林供奉得幸于昭宗希聲猶未達以詩寄詈光云云詈光感其言引薦遂得召後至相其力也

高蟾

蟾登乾符三年進士第
乾寧間為御史中丞

北夢瑣言云蟾詩思雖清務為奇險意疎理寡實
風雅之罪人薛能謂人曰倘見此公欲贈其掌然
而落第詩不向東風怨未開守寒素之分無躁競
之心公卿間許之終以策名

鄭谷嘗贈蟾詩云張生故國三千里知者惟應杜
紫微君有君恩秋後葉可能更羨謝玄暉蓋蟾有
宮詞云君恩秋後葉日日向人疎今全什亡

近體詩

春

明月斷魂清藹藹平蕪歸思綠迢迢人生莫遣頭如雪
縱得東風也不消

灞陵亭

一條歸夢朱絃直一片離心白羽輕明日灞陵新霽後
馬頭烟樹綠相迎

瓜洲夜泊

偶為芳草無情客況是青山有事身一夕孤洲渡頭宿

天風吹盡廣陵塵

下第後上永崇高侍郎

天上碧桃和露種日邊紅杏倚雲栽
芙蓉生在秋江上不向東風怨未開

錢珣

珣字瑞文吳興人起之曾孫也善文詞宰相王溥
薦知制誥進中書舍人昭宗有事郊壇嘗抗論內
臣不宜以朝服侍祠識者避之後溥得罪珣貶撫

州司馬

近體詩

江行

江曲全縈楚雲飛半自秦峴山回首望如別故鄉人
霧雲疎有葉雨浪細無花穩放扁舟去江天自有涯
景夕殘霞落秋寒細雨晴短纓何用濯舟在月中行
櫓慢生輕浪帆虛帶白雲客船雖狹小容得瘦將軍

王駕

駕字大用河中人登大順元年進士第仕為禮部員外郎棄官自號守素先生嘗與司空圖鄭谷為

詩友

近體詩

古意

一作王
駕妻

夫戍蕭關妾在吳西風吹妾妾憂夫一行書信千行淚
寒到君邊衣到無

社日

鵝湖山下稻梁肥
豚柵雞棲半掩扉
桑柘影斜春社散
家家扶得醉人歸

雨晴

雨前初見花間蕊
雨後兼無葉裏花
蛺蝶飛來過牆去
却疑春色在鄰家

亂後曲江

憶昔爭遊曲水濱
未春長有探春人
遊春人盡空池在
直至春深不似春

王貞白

貞白字有道信州永豐人五舉禮部登乾寧二年
第後七年始授校書郎嘗與羅隱方干貫休同倡
和有靈溪集

近體詩

終南山

終南異五嶽列翠滿長安地去搜揚近人謀隱遁難水
通諸苑過雪照一城寒為問紅塵裏誰同駐馬看

少年行

遊讌不知厭杜陵狂少年花時輕煖酒春服薄裝綿戲
馬上林苑鬪雞寒食天魯儒甘被笑對策鬢皤然

晚泊漢陽渡

落月臨古渡武昌城未開殘燈明市井曉色辨樓臺雲
自蒼梧去水從嶓冢來芳洲號鸚鵡用記禰生才

御溝水

一派御溝水綠槐相蔭清此中涵帝澤無處濯塵纓鳥

道來雖險龍池到自平朝宗心本切願向急流傾

郡閣雅言

云貞白御溝詩此中初作此波以示貫休貫休曰甚好只是刺一字貞白揚袂而去貫休曰此公思敏書一中字于掌頃貞白回曰此中涵帝澤休以掌示之始服

題嚴陵釣臺

山色四時碧溪光七里清嚴陵愛此景下視漢公卿垂釣月初上放歌風正輕應憐渭濱叟匡國祇論兵

秋日旅懷寄右省鄭拾遺

永夕愁不寐草蟲喧客庭半窓分曉月當枕落殘星鬢

髮遊梁白家山近越青知音在諫省苦調有誰聽

庾樓晚望

獨凭朱檻亦凌晨山色初明水色新竹霧曉籠銜嶺月
蘋風暖送過江春子城陰處猶殘雪衙鼓聲前未有塵
三百年來庾樓上曾經多少望鄉人

王穀

穀字虛中宜春人乾寧五年進士第尚書郎致仕
紀事云穀始與崔允同在庠序相善將赴舉允餞

之有日者在坐曰待此郎為相乃登第後二十年
允為相轂遂登第

古體詩

吹笙引

媧皇遺音寄玉笙雙成傳得何淒清丹穴嬌雛七十隻
一時飛上秋天鳴水泉迸瀉急相續一束宮商裂寒玉
旖旎香風繞指生千聲妙盡神仙曲曲終滿席悄無語
巫山冷碧愁雲雨

曹松

松字夢徵舒州人學賈島為詩久困名場昭宗天復初與王希禹等五人同登第時號五老榜授秘書省正字

昭宗實錄天復元年赦文令中書門下選新及第進士中有久在名場纔沾科級年齒已高者不拘常例各授一官於是禮部侍郎杜德祥奏揀到新及第進士陳光問年六十九曹松年五十四王希

禹年七十三劉象年七十柯崇年六十四鄭希顏
年五十九詔光問松希禹可秘書省正字象崇希
顏可太子校書時上新平內難授官制詞有念爾
登科之際當予反正之年宜降異恩各膺寵命之
語

撫言云松于詩外無他能時號其啟事為送年脚
狀然五七律時復有異句可誦

近體詩

山中

此地似商嶺雲霞空往還
衰條難定鳥缺月易依山
野色耕不盡溪容釣自閒
分因多卧退百計少相關

晨起

曉色教不睡卷簾清氣中
林殘數枝月髮冷一梳風
並鳥聞鐘語敲荷隔霧空
莫徒營白日道路本無窮

長安春日

浩浩看花晨六街揚遠塵
塵中一丈日誰是晏眠人
御

柳舞着水野鶯啼破春徒云多失意猶自惜離秦

題甘露寺

香門接巨壘畫角間清鐘北固一何峭西僧多未逢天
垂無際海雲白久晴峯旦暮燃燈外濤頭振蟄龍

霍山

七千七百七十丈丈丈藤蘿勢入天未必展來空似翅
不妨開去也成蓮月將河漢分巖轉僧與龍蛇共窟眠
直是畫工須閣筆況無名畫可流傳

南海旅次

憶歸休上越王臺歸思臨高不易裁為客正當無鴈處
故園誰道有書來城頭早角吹霜盡郭裏殘潮蕩月迴
心似百花閒未得年年爭發被春催

陪湖南李中丞宴隱溪

竹林啼鳥不知休羅列飛橋水亂流觸散柳絲迴玉勒
約開蓮葉上蘭舟酒邊舊侶真何遜雲裏新聲是莫愁
若值主人嫌晝短應陪秉燭夜深遊

己亥歲

澤國江山入戰圖
生民何計樂樵蕚
憑君莫話封侯事
一將功成萬骨枯

裴說

說唐末登進士第終禮部員外郎遭亂官不達多
遊江湖間其詩以苦吟難得為工且拘格律紀事
云唐舉子先投所業於公卿之門謂之行卷說只
行五言十九首至來年秋賦復行舊卷人有譏之

者說曰只此十九首苦吟尚未有人見知何假別
行卷哉識者以為知言

古體詩

寄邊衣

一作裴羽仙

深閨乍冷開香篋玉筋微微濕紅頰一陣霜風殺柳條
濃烟半夜成黃葉重重白練如霜雪獨下閒階轉淒切
祇知抱杵擣秋砧不覺高樓已無月時聞塞鴈聲相喚
紗窗只有燈相伴幾展齊紈又懶裁離腸恐逐金刀斷

細想儀形執牙尺回刀剪破澄江色愁捻銀針信手縫
惆悵無人試寬窄時時舉袖勻殘淚紅箋漫有千行字
書中不盡心中事一半殷勤託邊使

近體詩

冬日作

糲食擁敗絮苦吟今過冬稍寒人却健太飽事多慵樹
老生烟薄牆陰貯雪重安能只如此公道會相容

華山上方

獨上上方上立高聊稱心氣衝雲易黑影落縣多陰有
雪草不死無風松自吟會當求大藥他日復追尋

旅次衡陽

欲往幾經年今來意豁然江風長借客岳雨不因天戲
鷺飛輕雪驚鴻叫亂烟晚秋紅藕裏十宿寄漁船

道林寺

獨立凭危欄高低落照間寺分一派水僧鎖半房山對
面浮世隔垂簾到老閒烟雲與塵土寸步不相關

題岳州僧舍

喜到重湖北孤洲橫晚烟鷺銜魚入寺鴉接飯隨船松
檜君山迴菰蒲夢澤連與師吟論處秋水浸遙天

任翻

翻唐末人爵里無考常客居天台有宿巾子山詩
為人所稱

古體詩

洛陽道

憧憧洛陽道塵下生春草行者豈無家無人在家老雞
鳴前結束爭去恐不早百年路傍盡白日車中曉求富
江海狹取貴山岳小二端立在途奔走無由了

近體詩

秋晚郊居

遠聲霜後樹秋色水邊邨野逕無來客寒風自動門海
山藏日影江月落潮痕惆悵高飛晚年年別故園

三遊巾子山寺感述

清秋絕頂竹房開
松鶴何年去不迴
惟有前峰明月在
夜深猶過半江來

望夫石

何代提戈去不還
獨留形影白雲間
肌膚銷盡雪霜色
羅綺點成苔蘚斑
江鷺不能傳遠信
野花空解妬愁顏
近來豈少征人婦
笑採蘼蕪上北山

賦百舌鳥

此禽輕巧少同倫
我聽長疑舌滿身
星未沒河先報曉

柳猶粘雪便迎春頻嫌海燕巢難定却訝林鶯語不真
莫倚春風便多事玉樓還有晏眠人

鄭巢

巢爵里莫詳

近體詩

秋思

寒蛩鳴不定郭外水雲幽南浦鴈來日北窓人卧秋病
身多在遠生計少於愁薄暮西風急清砧響未休

泊靈溪館

孤吟疎雨絕荒館
亂峯前曉鷺棲危石
秋萍滿敗船
溜從華頂落樹與赤城連
已有求閒意來期在暮年

宿天竺寺

暮過潭上寺獨宿白雲間
鐘磬遙連樹星河半隔山
石中泉暗落松外戶初關
却憶終南裡前秋此夕還

陳氏園林

當門三四峰高興幾人同
尋竊新泉外留僧古木中
蟬

鳴槐葉雨魚散芰荷風多喜陪幽賞清吟繞石藂

題崔中丞北齋

湖近草侵庭秋來道興生寒潮添井味遠漏帶松聲放
卷聽泉坐尋僧踏雪行何年各無事高論宿青城

贈丘先生

雲泉心不爽垂目坐柴關硯取簷前雨圖開異國山原
僧招過宿沙鳥伴長閒地與中峰近殘陽獨不還

贈蠻僧

南海何年過中林一磬微病逢秋雨發心逐暮潮歸久
卧前山寺猶縫故國衣近來慵步履石蘚滿柴扉

送衡州薛從事

吟去望雙旌滄洲晚氣清遙分高岳色亂出遠蟬聲楚
霽雲連寺湘寒浪浸城狐猿不可聽一聽白髭生

送李式

瀟湘路杳然清興起秋前去寺多隨磬看山半在船綠
雲天外鶴紅樹雨中蟬莫使遊華頂逍遙更過年

御定全唐詩錄卷九十七